

吳邑志卷第九

人物傳三

唐

五代

宋



唐

陸元朗德明蘇州吳人也善名理言仕陳始興
王國常侍陳亡歸隋煬帝擢秘書學士大業間
廣召明經士會門下省元朗與相酬難衆不能
訕遷國子助教越王侗時以司業授經殿中王
世充僭號東京以元朗爲子漢王玄恕師即其
廬行束修禮元朗耻之服巴豆劑僵偃東壁下
玄恕入拜牀前元朗對之遺利不復開口遂移

病去世充平秦王辟爲文學館學士以經授中山王承乾補國子博士封吳縣男卒論撰甚多子敦信檢校右相終大司成

朱子奢蘇州吳人父才北齊諫議大夫子奢少業左氏春秋善文詞隋大業中爲直秘書學士天下亂辭疾歸鄉里後從杜伏威入朝授國子助教累官散騎常侍貞觀初遷諫議大夫弘文館學士十五年卒

陸元方希仲陳黃門侍郎琛曾孫舉八科皆中官爲監察御史武后時拜鸞臺侍郎同鳳閣鸞

臺平章事卒贈越州都督子象先

象先器識沈邃舉制科高第累官中書侍郎景雲中同中書門下平章事性恬靜寡欲議論高正玄宗即位以保護功封交國公出爲益州長史以仁恕稱歷戶部尚書太子太保公如故卒贈尚書左丞謚文貞弟景融

景融博學工筆扎終工部尚書四世孫希聲

希聲善屬文通易春秋老子論著甚多商州刺史鄭愚表爲屬韋保衡爲相怙勢忌賢希聲去隱陽羨號遁叟久之召爲右拾遺累刺歙州昭

宗聞其名召拜戶部侍郎同中書門下平章事
以太子少師罷卒贈尚書左僕射謚曰文

顧少連夷仲蘇州吳人大曆五年擢第德宗幸
奉天授翰林學士中書舍人以謹密稱官至吏
部尚書卒贈右僕射謚曰敬

張謚季樵蘇州吳人郭子儀表為元帥判官累
遷汲滑節度使建中二年拜中書侍郎同中書
門下平章事卒贈太子太傅大中初圖形凌煙
閣撰五經微旨孟子音義二書

沈傳師子言蘇州吳人治春秋工書有楷法貞

元二十一年在士及第復登制科累遷知制誥
翰林學士中書舍人穆宗朝以本官兼史職出
為湖南觀察使即官下修憲宗實錄寶曆二年
入拜尚書右丞為吏部侍郎太和初卒贈尚書
祭無儲錢鬻宅以葬子詢昭義節度使

楊收藏之蘇州吳人隋越國公素之裔善屬文
博學強記至他藝無不通解會昌元年及第懿
宗時拜中書門下平章事進尚書右僕射貶驩
州卒後詔追雪其辜復官爵

陸展祥女蘇州吳人光啓二年僖宗在興元舉

進士第一進翰林學士中書舍人屬辭敏速昭宗嘗於金鑾殿作賦詔學士皆和獨辰先就帝歎之累爲尚書左丞徙中書侍郎進同中書門下平章事貶刺峽州還拜工部尚書天復初貶濂州司戶卒曰馬驛

附

詩家三人草聖一人

顧況蘇州吳人能爲歌詩官著作卽坐貶不仕結廬茅山自號華陽真逸年九十卒子非熊長慶中敕賜及第

張籍吳人貞元進士仕至國子司業爲詩長於古風號元和體病失明卒

陸龜蒙元方七世孫少高放通六經大義尤明春秋舉進士不中歸耕吳中有別業在邑西震澤之濱召拜左拾遺命方下卒常莊表贈右補闕

張旭吳人善草書爲常熟尉有部民屢求判以其蹟爲寶官至金吾長史

五代

楊涉收弟子哀宗時以兵部尚書進同中書門

下平章事加中書侍郎天祐四年帝禪梁以涉
為押傳國寶使改戶部侍郎卒子凝式善行草
以書名海內官至禮部尚書

附

善畫一人

李成蘇州吳人五代末以畫知名

宋

楊崇勳蘇州吳人父全美太宗時為殿前都指
揮使崇勳以父任給事東宮真宗即位授左侍
禁四方客館使累拜樞密使加中書門下平章
事出判陳州卒贈太尉諡恭毅

范仲淹

希文

蘇州吳人也父墉從吳越歸朝仕

為武寧節度掌書記卒官仲淹少長淄州姓朱
名說嘗舉學究不第漫遊鄆杜間遂之南都力
學大中祥符五年禮部舉第一尋登乙科調廣
德軍司理叅軍天禧元年遷權集慶軍節度推
官始奏復本姓名仲淹四年除秘書省校書郎
監泰州西溪鎮鹽倉進大理寺丞除興化令丁
憂寓居睢陽留守宴殊請掌府學事服除殊在
樞府薦署秘閣校理仲淹上疏請太后還政忤

旨請外出通判河中府轉殿中丞改陳州明道
元年太后崩召除右司諫郭皇后廢仲淹率其
屬及羣御史伏閣門極諫有詔降知睦州明年
爲景祐元年徙蘇州二年就拜天章閣待制召
還判國子監益論時政闕失大臣權倖多忌惡
之數月以仲淹權知開封府仲淹病中書擅權
爲百官序遷圖上之與平章呂夷簡交論上前
坐落閣職知饒州徙潤州又徙昇州寶元初趙
元昊悉衆寇延州大將戰歿仲淹自知越州復
職知永興軍未至進戶部郎中龍圖閣直學士
充陝西經畧安撫副使同管勾都部署司事兼
知延州父之坐與元昊通書降本曹員外郎知
耀州俄徙慶州遷左司郎中本路安撫招討使
兼兵馬都部署涇原帥再敗定川關韜復震仲
淹率兵赴援寇引去上聞大悅進樞密直學士
慶曆二年冬進爲陝西四路都部署經畧安撫
招討使開府涇州仲淹謀取橫山故地漸復靈
夏元昊懼請和三年入拜樞密副使改右諫議
大夫叅知政事仲淹有所建白上稍施行之衆
不便謗輿不自安奉乞一遷郡許之乃以本官

宣撫陝西河東五年正月乞解政事拜資政殿學士知邠州兼陝西四路緣邊安撫使就賜推誠保德功臣加金紫光祿大夫護軍封汝南郡開國公于時姤者不息至爲飛語聞上天子以爲疑詔罷仲淹邊任進給事中資政殿大學士知鄧州徙知杭州皇祐三年進尚書戶部侍郎知青州兼兗淄登萊沂密齊淮陽州軍安撫使四年徙知穎州未上平年六十四贈兵部尚書謚文正累贈太師中書令追封魏國公子純佑純仁純禮純粹

純佑尚節行以蔭守將作院主簿疾廢卒

純仁先夫母懷娠時夢兒自月中下以衣承之

明日而生幼警悟八歲從群兒戲能講說正席

衆環聽父深異之一時名儒若孫復石介胡旦

李觀皆從之游由是博通群書以父政府郊恩

授太常寺太祝皇祐元年登進士乙科不欲去

親側不就調父卒家貧無歸借官屋以居終喪

除著作佐郎知汝州襄城縣賈昌朝知許州辟

簽書觀察判官廳公事事無大小悉任之遷權

河南東路轉運判官治平元年召爲侍御史有

詔命朝堂議當時典制純仁與中丞呂誨等更
論奏不報繳納告身居家待罪詔免施行純仁
請外不已乃出純仁通判安州遷權京西轉運
副使召對除尚書兵部員外郎兼起居舍人同
知諫院上言王安石宜停相位亦不報求罷諫
職改管勾國子監以言不用再乞黜降盡錄所
上章疏申中書安石大怒乞加重貶出知河中
府徙成都路轉運使純仁戒州縣毋遽行新法
安石怒以爲阻格左遷知和州移邢州未到進
直龍圖閣權環慶路經畧安撫使兼知慶州

延帥呂惠卿奏純仁擅回牒坐視寇至不援落
職知信陽軍移齊州期歲請祠命管勾西京御
史臺再知河中府復閔職再知慶州哲宗即位
太皇太后權同聽政遷天章閣待制兼侍講拜
給事中元祐元年進吏部尚書數日拜中大夫
同知樞密院事三年拜守尚書右僕射兼中書
侍郎同平章事明年坐救知安州蔡確遠竄罷
爲觀文殿學士出知穎昌府踰年進大學士移
河東路安撫經畧使知太原府夏人犯麟府寨
朝廷詰責將吏純仁固求貶削乃降一官移知

河南府又移穎昌府未幾召赴闕復拜通議大夫守尚書右僕射同平章事太后崩哲宗親政相章惇純仁固爭垂簾時事不報因請避位紹聖元年夏四月充觀又殿學士知穎昌府黨論興從例降一官移知陳州是歲郊恩元祐流人不得赦純仁申理之惇詆爲同罪落職知隨州明年目失明目武安軍節度副使永州安置徽宗立除右正議大夫復大學士充中太一宮使召供職純仁旣失明又得風痺疾不能就命建中靖國元年正月二日卒于穎昌年七十五

贈開府儀同三司謚忠宣建炎四年贈太師追封許國公子正民萊州團練使正平忠武軍判官贈朝請大夫正思宣德郎

純禮以父蔭起家祕書省正字徽宗朝拜禮部尚書元符三年擢尚書右丞黨禁興貶靜江軍節度副使均州安置復左朝議大大卒紹興元年贈資政殿學士謚恭獻

純粹以蔭補官仕至戶部侍郎責別駕鄂州安置黨禁解復徽猷閣待制致仕卒

鄭戩天休蘇州吳人祖父世事吳越爲幕府官

戰天聖三年舉進士甲科歷閣學京尹權三司使康定元年除右諫議大夫同知樞密院改樞密副使累帥陝西四路爲大將在邊有威名官至檢校太保奉國軍節度卒贈太尉謚文肅程師孟公闡蘇州吳人高祖思錢氏營田使世居南園側畫錦坊景祐元年舉進士神宗熙寧中直昭文館歷知楚夔洪福廣五大州所至民爲立祠刊石頌德除右諫議大夫京東安撫使暮年告老哲宗即位授光祿大夫卒年七十八葬橫山有詩集奏議等著作

滕甫元發蘇州吳人景祐五年進士神宗朝擢知制誥知諫院累遷御史中丞歷知開封真定應天三府鄆定青齊登湖揚七州終龍圖閣學士卒贈左銀青光祿大夫謚章敏

遙知白公式平江吳人宣和六年進士爲吳縣尉孝友純誠尤深內典紹興中直學士院官至吏部尚書同安縣開國侯歸鄉卒贈徽猷閣待制少師子維成朝請大夫從弟惇德

惇德才思敏給凡五中鄉舉賜特奏名出身郡縣列上行義改通直郎撰脂韋子

附

文學儒林各一人

許洞吳縣人父仲容太子洗馬洞學精左傳咸平三年進士爲雄武軍節度推官坐事除名景德中獻所著兵書應籌策科以譴報罷尋除均州錄事參軍真宗封祀獻三大禮賦召試中書改烏江主簿卒有集一百卷及春秋釋幽演玄訓俗書

朱長文吳人父公綽光祿卿長文尤邃春秋年十九擢乙科進士授秘書省校書郎守許州司戶叅軍丁憂家居築室故錢氏金谷園名動京師元祐中起爲本州教授歷五考召爲太學博士著釋問以見意紹聖間除秘書省正字兼樞密院編脩文字卒所著有春秋通志琴史蘇州續圖經樂圃文集等書

南宋

李彌大伯矩平江吳人父撰朝奉大夫彌大登崇寧三年進士累官給事中禮部侍郎金人大舉入寇除河東宣撫使河南陷命知陝州州復

陷乃率衆赴大元帥府高宗如杭州權知紹興府終工部尚書卒

王蘋信信平江吳人早從河南程氏學通春秋三舍法行遂不就舉紹興初高宗幸平江知府孫休言蘋素性高潔有治才丞相趙鼎以聞召對補右迪功郎賜出身除正字兼史館校勘預脩神宗實錄遷著作佐郎通判常州主管台州崇道觀官至左朝奉郎卒年七十二嘉熙元年知府王遂祠之學宮從孫楸

楸所著有野客叢書巢暵稿筆子德文官承節郎子孜 孜著雲嶠類要

范成大至能平江吳人父雱秘書郎成大紹興二十四年進士擢第乾道元年擢著作郎累官禮部員外郎兼崇政殿說書孝宗隆興再講和以受書禮未定假成大資政殿學士兼侍讀充金國祈請使使因求陵寢別口請之成大至夔山草奏以獻金主大駭成大趨出既還館金主遣伴使宣旨取奏一時名震北庭使還除中書舍人加集賢殿修撰知靜江府除敷文閣待制四川制置使知成都府入對除權吏部尚書淳

熙五年遷中大夫叅知政事纔兩月以資政殿
學士出知婺州未上領祠起知明州兼沿海制
置使除端明殿學士江東安撫使兼行宮留守
知建康府以病請閏十六年起知福州再領祠
紹熙三年加大學士知太平州致仕封吳國公
明年卒年六十八贈銀青榮祿大夫少師追封
崇國公謚文穆成大爲文膽麗清逸尤工於詩
有石湖集吳郡志等書行世

周虎叔子平江吳人慶元二年武舉進士第一
官至武功大夫和州防禦使卒謚忠惠

附

忠義一人

滕茂實元發從子也政和八年上舍登第官

奉議郎靖康元年金人入寇茂實假工部

侍郎副路允迪出使河東割地太原陷黏

罕將收爲用遂留真代州嘗使人諭茂實

易戎服又驅巾幘稍高者數人至前殺之

茂實弗動欽宗過代州茂實具衣冠迎謁

拜伏號勸請從舊臣俱行金人不許朔寧

府司理董說拔身南歸茂實附表以聞其

後竟卒塋臺山寺傍紹興二年追贈龍圖閣直學士官其家三入謚忠節

元

孟文龍震翁孟子之後昭慈后五世孫也高祖信安郡王忠厚判平江遂爲平江吳人初補將仕郎後中銓試授迪功郎累除浙東提舉常平公事文龍自咸淳以來被命主昭慈祀事元兵下江南平章史弼欲薦起之文龍致書以死辭乃止自是不出戶庭以讀易終身

干文傳壽道平江吳人初爲饒州慈湖山長延祐科舉法行文傳首中江浙鄉貢明年會試登乙科授承事郎同知昌國州事累陞朝列大夫吳江州知州至正三年脩遼金宋三史召爲集賢待制朝請大夫碑在身史前局史成進禮部尚書嘉議大夫致仕卒

附

儒林一人忠義二人

俞琰洞庭山人在宋以詞賦稱宋六隱居著書不復仕精於易學尤好鼓琴既老自號石澗翁元貞間卒自注周易上下經十翼

及撰幽明辯惑弦歌毛詩譜等書
揚椿吳人少尚節義元末總兵叅政脫寘辟
爲叅謀守婁門張兵至衆皆潰椿獨探甲
持弓匹馬突出禦之身被數鎗死
陳謙在城人善詩賦通周易至正十六年元
訓爲江浙行省幕官還家視弟俄遇亂兵
入室被斫謙以身蔽并遇害

吳邑志卷第九

吳邑志

卷第十

人物傳四

本朝

洪武永樂中人

滕德懋思勉邑人元季爲掾江浙行省從
省臣分鎮台州

國初台既納款徵擢丞相府掾史德懋素善
刀筆一時文移多出其手已而從征僞
漢有功除知信州改建昌府同知進知
潭州府吳元年十一月擢奉訓大夫湖

廣行省左右司郎中贊畫勤勞庶務咸
理洪武元年八月擢中書右司郎中散
官如前二年十二月擢拜嘉議大夫兵
部尚書累任俱給

誥命卒有墓在西山有碑

郁新邑人以前元至正六年生於邑西橫
山下家素饒財洪武元年年二十三隨
父徙居鳳陽臨淮慷慨豪舉喜賓客樂
賑窮乏二十一年以人材

徵授戶部度支主事賜名新明年改官制戶

部設十二屬司陞北平部郎中二十四
年超授嘉議大夫戶部右侍郎考滿奏
績 廷中

上問錢穀數目應答無遺顧廷臣稱譽之陞尚
書授資善大夫後事

太宗凡總邦計十三年永樂三年卒年六十
命工曹具櫬櫛輟 朝一日并

賜以祭葬臨淮古城之原翰林解縉銘

許思溫叔雖世爲邑人祖父皆好善樂施
思溫素朴直少居吳山下學朱氏詩

國初詔諸路建學首補邑學生洪武二十六
年貢胄監二十九年

詔選材於六堂其中程者特授以官思溫時
在首選署刑部郎中改除御史尋陞北
平按察司副使三十二年

文皇帝奉天靖難擢署大興縣事是年奉

教往永平所屬州縣集民丁永樂元年以守
城功陞授行在吏部左侍郎奉表入

朝留為吏部左侍郎階嘉議大夫二年兼左
春坊左贊善轉通議大夫前官如故六
年夏卒年四十二葬靈巖鄉洪熙元年

制贈資善大夫吏部尚書

附

文學二人忠直隱逸孝行各一人

楊基孟載邑西赤山人有詩才造語新
麗與長洲高啓齊名

國初官至山西按察使有眉菴集行世

徐達左良夫光福人生元末家故饒財
讀書好客以耕漁扁居名著東南洪
武中薄宦考終達左學問醇正著有

顏曾思孟四子書刻行

陳祚永錫在城甘節坊人治春秋素工書翰永樂九年以府學生進士擢第明年有

制親除河南叅議坐與憲司訐奏謫太和山佃戶十年宣德元年使者群試其文第一擢御史坐上書得罪闔門繫錦衣獄又五年正統初

赦復舊官出巡湖廣又坐條奏宗藩事論死再免改南臺屢更危險志氣不

挽終福建僉事所至稱廉卒見

大明一統志著有書卓躍小學集解

韓奕公望臯橋人魏公裔孫也詩楷蕪工才情俊逸永樂中二弟俱侍

清禁獨抗高標真心丘壑郡將慕其賢不得見卒年七十三所著有本草歌括傷寒類法新效方詩集易牙遺意等書皆梓行

載君用本邑人父福洪武中因監稅失火法當死君用代父刑于閹門其妻

吳氏守節旌表見邑前申明亭碑

永樂至成化年間

金問公素邑人少學易文行敦茂兼工松雪書永樂元年被薦為司經局正字後坐繫十年講誦不輟洪熙元年

宥出授翰林修撰仍

命待詔思善門宣德正統間歷翰林侍讀學士禮部左侍郎卒有集無傳

陳繼嗣初邑人在城西南隅人祖澂本居溢城草廬弟子也從婦翁江丞相家來

吳生子汝言工詩能琴尤善繪事偽吳時為太尉府叅軍

四初擢官濟南府經歷卒繼生方十月母吳教以學遂通易詩二經有名於時

仁宗臨御初首命在廷舉文學士少保楊士竒以繼薦即日

詔驛召之既至授國子博士明旦入謝改翰林五經博士時初建

弘文閣於思善門右以儲經籍繼奉命副學士楊溥董其事兼侍

燕閒備 顧問未幾

宣廟嗣統 詔修

兩朝實錄以繼充纂修官書成進檢討宣德七年解官歸又明年卒年七十五繼天性純孝篤信義文章典雅有法一時宗尚之有怡菴集梓行子五人宗寬宏宣完皆不求仕以儒業重於鄉閭

陳鑑有戒世為邑人性寬和美髯偉幹永樂九年年踰弱冠以府學生領鄉薦明年登進士第擢御史秩滿陞浙江按察副使差往魯家務運木宣德十年用大臣薦陞都察院右副都御史奉

命鎮守陝西

英宗即位取還本院管事未幾復領前任出鎮于西以便宜從事居三年代還進右都御史又奉

敕整飭延寧甘肅等處軍務就彼守備鑑處度勤敏不失機宜奏置靖虜衛添設河橋巡檢司及於馬營迤西設寨堡墩臺一千餘所西土賴之正統十年又代還

掌印管院事十四年

大駕親征胡虜以鑑與同官王悅中使阮蹇等
爲番守點視城池既而虜寇畿邑

命爲左都御史差往通州撫安軍民景泰二
年陝西旱民饑流移鎮守官以鑑請從
之鑑往賑濟一年而還

朝廷嘉其功賜玉帶白金綺段羊酒進階榮
祿大夫 太子太保兼左都御史掌院
事如故四年秋忽邁風疾乞歸

賜驛舟道費遣醫護視七年春卒年六十八

追贈少保謚僖敏鑑自持清儉雖居顯
位不營家產歿後子仲始蔭刑部與磨
葬橫山下少傅陳循撰神道碑

楊翥仲舉邑人大師和王沂中之八世孫
也少孤貧從兄戍武昌爲鄉校師爲人
端厚和裕存心不欺事母及兄孝弟著
聞洪熙元年

詔求賢遂預薦舉

仁廟雅知翥名即遣使驛召之初授翰林院檢
討陞編脩脩撰與脩

三朝實錄陞

邠府右長史奉職益恭正統十

年告老歸吳景泰元年

景帝即位念者舊勞不欲煩以事遣使賚

敕就家拜禮部左侍郎命方載途而翥亦朝

京師既見辭歸

賜誥命及道里費俾食其俸致仕三年復朝

進資善大夫禮部尚書加俸仍歸翥天

性仁恕犯而不校工書能文詩尤冲澹

有希顏齋集梓傳身居六卿猶假室以

居薄田半頃纔供饋粥而已四年秋卒

年八十五計 聞

命有司獎繫子理時方八歲知府汪潯爲請

文立碑未幾

詔以肆爲本縣主簿

徐有貞元玉世爲邑人幼從父震以閭右

徙吉師性穎出受業祭酒胡儼宣德八

年進士登科預選翰林爲庶吉士其數

上祝列宿

宣宗御便殿悉召試之擢第一即日授編修官

正統元年預修

實錄書成陞脩撰九年績滿陞侍講嘗奉

命修

玉牒五倫君鑒等書充纂修官正統

十四年胡虜入寇假監察御史分守河

南彰德府得民兵數萬人虜退

召還復侍講景泰元年選充

經筵講官明年陞左春坊左諭德仍兼侍講

時河決山東張秋衝開堤岸三百里饑

道阻絕有

詔朝堂議能治者有貞請行四年特陞都察

院左僉都御史

命督軍民夫三十萬脩築至則作渠起張秋

至衛沁凡河流傍出者堰之凡作堰九

長袤皆至萬丈障水北歸漕河於是始

築其缺作水門大堰虹堤交相扞禦比

三年乃成以功陞左副都御史掌堂事

八年正月十七日

英皇復辟有貞以翊戴功陞兵部尚書兼翰林

院學士掌

內閣事二月持節立

東宮陞右柱國俄進推誠宣力守正文臣特

進光祿大夫柱國武功伯食祿一千一百石賜券子孫世襲指揮使兼

華蓋殿大學士掌閣事如故有貞膏舉侍郎一人同管事其人反忌之結奸臣曹欽

石亨等中以飛語下獄尋被

赦旨出為廣東左叅政出數日復以匿名書逮還又再下獄訊三日無實狀乃得編置金齒為民居三年

上益軫念特命戶部移文還其家

憲宗踐祚覃恩復冠帶又九年為成化八年

秋半年六十六有貞文詞敏瞻善書好談論其學無所不窺號稱博聞所著有史斷文集葬玉遮山下

附

大魁文學隱逸各一人

施榮宗銘洞庭東山人正統四年以縣學生捷禮闈入對

大廷以敬字立說敷陳有經濟學

賜狀示及第第一人除翰林院修撰

國朝立首選惟榮最少諸老屬以遠大明

年五月卒于京師

劉旦欽謨南潏里人正統元年年方弱冠舉南畿解元明年以會魁登科為六贍麗詩宗盛唐一時稱為名家景泰中官水曹嘗預

內閣纂修天順元年罷還南都官至廣東參政卒所著有中州文表河南志姑蘇志文集等書

杜瑄字用嘉太平坊人生宣德正統間事母至孝以授徒為養兼治蔬圃稱東

原生每求賢

詔下有司以瓊應輒辭不就彈琴讀書茅堂之下有德有言里巷化之卒年七十九會葬千人私謚淵孝先生有東原集紀善錄耕餘雜錄等書

成化已來至今

王鏊濟之邑西洞庭山人父朝用光化知縣祖曾三世皆贈少傅一品階官鏊年十六隨父在國學讀書有奇名成化十年鄉試明年會試皆第一人

廷試賜進士及第第三人授翰林院編修居
官九載陞本院侍講

孝宗初開經筵充展書官預修
憲廟實錄書成陞春坊右諭德俄進侍講學士

舉充日講官

東宮出閣議擇官僚為輔導轉左諭德尋陞
詹事府少詹事兼侍讀學士擢吏部右
侍郎比虜入寇上籌邊四事以外艱歸
正德元年起復轉左侍郎兼
國史副揔裁二年以本官兼翰林學士

內閣辦事進戶部尚書

文淵閣大學士未幾再進光祿大夫柱國少
保兼太子太傅

賜蟒衣玉帶四年夏上章乞歸以戶
官致仕
仍給人夫月廩終身既歸屢被
剡薦皆
不報

皇上登極加恩四海遣行人存問鑿上章謝
就獻務學勤政二箴

詔嘉納仍官一子中書舍人嘉靖三年以撫
臣李克嗣疏薦又

命有司存問是年春卒年七十五計

聞輟視朝一日

賜賻及祭以上部治墓事鑿素博洽多聞文
詞古奧尤邃於詩所著有震澤集長語
紀聞等書子延喆延素俱陰京秩

附

廉介清藝各一人

黃鏞汝器城西上塘人宣德元年由府
庠克貢歷官倅貳陞知南寧府仁
厚有德民非甚博不輒加

清廉俸外一無餘貲以懸車引年

詔進三品階列中奉大夫致仕成化中卒

年八十六又有綿州知州蘇復性初

宣德八年以曹監出身素工書善山

水有詩集五卷勇退灌園高尚其事

先卒其人清謹有文今附此

又總附

節婦特書二人

翰林陳繼母吳氏者本廬江宦族也步
獵經史尤工文繡良人陳汝言有才

名坐事卒官家貧遺孤未晬親時蔬
以養其姑且誨子書授之詩琴又作
女範貽子婦遵之永樂元年

救御史覈其貞節旌門年八十六終後副

業儒者不絕焉又杜王妻顧氏隱逸

杜瓊母也賢明秉操大略與吳同正

統四年府君况奏上其行

詔旌之壽亞吳二年儒亦再世而顯矣

吳邑志卷第十

吳邑志卷第十一

山

城西南名山

靈巖山即古硯石山吳縣圖經云在縣西二十

里亦名石鼓山越絕書云吳人於硯石山作館

娃宮又云硯石山去姑蘇山十里闔廬養越美

人於此上有兩湖吳越春秋云闔廬城西有山

號硯石高三百六十丈去人煙三里去吳縣西

三十里上有吳館娃宮董覽吳地記云吳王離

宮在石鼓山越獻西施於此有琴臺在其上續

圖經云硯石山西有石鼓故以爲名山頂有三池一曰月池一曰硯池一曰翫華池雖旱不竭蓋吳時所鑿也山上舊有響屨廊其下有石室今存俗傳吳王囚范蠡之地又有巖村其山出石可以爲硯蓋硯石之名由此也吳郡志云登山見太湖諸山在銀濤中亦宇內絕景今按此山多石少土無樹藝特資巖鑿之用高峻望遠之山也

古蹟館娃宮

重云古館娃宮有石城

吳王井

一圓一八角今存

琴臺

在山上

硯池

在絕頂其水

早歲不竭

石鼓

大三十圍

西施洞

一石室

采香逕

在山前十里西施故蹟

寺

靈巖寺

梁建在山上

墓

宋韓蘄王墳

葬此山西麓

餘山二

婁姑山一在東里 大林山在北一里

橫山吳地記云在縣西南十一里唐十道志云此山四面皆橫蓋因以得其名也又吳郡志云

在城西十五里以其背臨太湖勢若箕踞故一
名踞湖山山有五大塢又名五塢山續記云此
山鎮郡西南臨湖控越實吳時要地隋時遷郡
於橫山東亦以是山爲屏蔽也山周圍甚廣環
以佛刹如薦福楞伽寶華堯峯之類皆在焉其
支隴傍出各立山名今列于左

上方山在東南麓首枕石湖其高突兀

茶磨山在東北麓其形如磨頂平廣數十畝

吳山在南麓有嶺宋時堯治

五塢山在北麓多塚墓古今葬處

堯峯山在西麓堯時人民避水登此故名下臨

太湖最高也 寶華山在南麓

黃山山脉遙屬橫山俗名筆格山

古蹟吳王郊臺 在橫山東麓石湖之上吳

王嘗祭天於此今遺跡尚存

越城 在越來溪東越伐吳吳王在姑

蘇臺越築此城以逼之今遺址高

者猶丈餘闊三丈或斷或續凡四

百八十丈

隋新郭 朱伯原云隋文帝時移郡邑

于橫山即此是

吳朝大井 在治平寺前山岡上一名

越公井徑一丈八尺原有石闌如屏繞之其上刻字多不可辨又有唐廣明元年釋茂乾述大唐楞伽殿後重修吳朝大井記畧云惟茲巨井吳志坐當橫山艮位越來溪西百步隋開皇十年越國公楊素築城泐斯井焉時屯師孔多曰飲萬人邇來三百餘年邑則可改其道不革按此卽是楊素井素旣平陳嘗遷郡於山下謂之新郭茂乾修井記題首乃云吳朝大井益傳襲訛也或云其井正當郊臺下乃吳王開而素浚之井記又云寺創於乾元元年

塢 九龍塢 感慈塢 薦福塢 多墓穴

嶺 鴨踏嶺 長圻嶺 二嶺俱高峻

寺 楞伽寺 隋建 有五顯殿

治平寺 梁建 寶積寺 隋建

明因院 廣陵王墓菴今廢

施水院 宋建 薦福寺 廣陵王建

堯峯寺 寶華寺 吳山院

墓 晉張翰墓 陳顧野王墓

餘山三

丁家山 昇猶山 花園山

姑蘇山 吳縣圖經云在縣西三十里一名姑胥山續圖經云在縣西三十五里連橫山之北或曰姑胥或曰姑餘其實一也傳言闔閭作姑蘇臺一曰夫差也姑蘇志云姑蘇山在橫山西北姑蘇臺在其上今按此山莫知所在或云不在此在大湖濱世遠傳聞異辭無定說

古蹟姑蘇臺 一名胥臺一名姑餘在橫山

西北麓姑蘇山上闔閭作又云夫差作五年乃成造九曲路高見三百里與西施日夜遊之後越伐吳遂焚其臺按此臺或云在大湖胥山今不知孰是

穹窿山續圖經云在縣西六十里越絕書云穹窿山者古赤松子嘗於此山採赤石脂處也神

仙傳云赤松子秦穆公魚吏也食桂實石脂絕粒後上吳山升仙去吳郡志云穹窿山吳中山最高深處赤松子取赤石脂於此吳地記云穹窿山東西兩嶺相趨名曰銅嶺盧志云此山特高峻郡之鎮也姑蘇志云穹窿山比陽山尤高其頂方廣可百畝也

古蹟朱買臣讀書臺 一盤石平坦猶存

泉 法雨泉 下注石堰灌田數頃

塢 紫藤塢 幽深多藤花可掇

寺 穹窿寺 梁建 朱買臣故宅

白馬寺 梁建 海雲菴 姚少師隱處

墓 宋盧革墓 太子賓客 趙希憚墓 太師

餘山二

查山 鳳凰山 在甯里

光福山盧志云在縣西南七十里姑蘇志云鄧尉山俗名光福山與玄墓銅坑諸山聯屬也

寺 光福寺 梁建 在龜峯下有塔

橋 虎山橋 兩峽一溪盡巒四匝有湖在

其中名西崦也

崦 下崦 上承太湖東流匯此

鎮 光福鎮 民爨千餘街陌交通

廟 東嶽廟 在虎山高岡上

餘山十

安山 在西里 虎山 北里 銅井山

蜀山 聚塢山 小雞山 長山

新豐山 錦峯山 西蹟山

玄墓山盧志云在縣西南七十里舊云宋青州刺史郁泰玄葬此故名姑蘇志云玄墓山南面太湖今按此山有土有石宜松竹楊梅柑橘而梅特盛高大之山也

寺 萬壽聖恩禪寺 元釋時蔚建

餘山十四

柵山東 石帆山 呂山 竺山西

法華山 觀山 吾家山 茶山

苑山 楮山 邢山 雅宜山

周山 漁洋山 並在南

胥山續圖經云在縣西三十里寰宇記云四十里或云即姑蘇山圖經云吳王殺子胥浮尸於江吳人憐之立祠江上因名胥山水經云胥山上石壇長老云胥神所治也下有九折路南

出太湖闔閭造以遊姑胥臺而望太湖也或曰
姑蘇山一名胥山越絕書云闔閭徙治胥山姑
蘇志云今太湖胥口或云即姑蘇山未詳

祠 伍相祠 在此山上

津 胥口 在此山北太湖水所出也

香山盧志云在縣西南六十里與胥口相直吳
地記云吳王遣美人採香於此或云種香處西
北連穹窿山傍有溪名香水溪

餘山二

黃茅山 在西南五里 周山 並在西

城西名山

岸蓼山吳地記云在縣西十二里吳王停葬此
中有寺號思益梁天監二年置續圖經云山形
如獅子今以此名山也越絕書云苻雄山故爲
鶴阜山禹遊天下引湖中柯山置之鶴阜更名
苻雄又云苻雄山南有大石古爲陸星土公縣二
十里水經云吳國西十八里有岸嶺山俗說此
山本在太湖中禹治水移進近東又西六兩有兩
小山皆有石如卷苻云禹所用牽山也太湖中
有淺地長老云是岸嶺山躡自此以東差深也

言是牽山之溝去太湖三十餘里吳郡志云鶴
阜山亦名峯崑山世傳禹治水時令童男童女
入太湖引出此山欲以填水至鶴邑墟不肯進
因名鶴阜山或云即獅子山也山上有石卷兩
小山今右曰鈴山左曰索山盧志云峯崑山在
縣西南十五里俗因其形名獅子山姑蘇志云
峯崑山南頂上有巨石二如樓云是獅子兩耳
自元以來鑿石俱盡今按此山多石少土無樹
蕤巉巖之山也

寺

思益寺

唐建

在山南

墳

吳王僚墳

宋皇妹公主墳

山所名

餘山三

索山在東里

鈴山

在西里皆古

皇妹山

在西北里

何山盧志云在縣西南一十五里有山神廟姑
蘇志云何山在獅山北一里其地舊名鶴邑墟
故山名鶴阜山因梁隱士何求何點葬此改今
名今按此山土多石少隤然田中傍無連屬卑
龍之山也

寺

資福寺

梁建

宋高宗賜名

墳 齊隱士何求墳 梁何點墳

支硎山吳地記云在縣西十五里晉支遁道林嘗隱此山後得道乘白馬昇雲而去山中有寺號曰報恩梁武帝置續圖經云報恩山一名支硎山在縣西二十五里晉有報恩寺故以名云所謂南峯中峯皆其山之別峯也今名楞伽山天峯中峯二院建其傍蘇州志云平石爲硎山有平石故因支遁以支硎爲號焉玉篇吳有臨硎山卽此是也其石室寒泉乃道林盤桓之處自昔著稱姑蘇志云支硎山其南有石門尤奇特今按此山去城不遠且清僻可賞至於茶梅煙雪景物擅奇名勝共遊之山也

古蹟支公石室 在山麓

寺 觀音禪寺 中峯院 南峯院

泉 寒泉 石澗長流而後轟雷噴雪

石 馬跡石 支公好蓄駿馬今有馬足跡

四存及石上有馬溺黃色一帶

石門 兩石突起如門下臨絕壑

塢 金盆塢 浮邃 茶塢 多種茶

嶺 斜堰嶺 最高遠人行不絕

餘山五

定山 在北 高景山 北 羊山 西北

金山 南 牛頭山 南

天平山續圖經云在縣西二十里巍然特高群
峯拱揖郡之鎮山也山腹有亭亭側清泉泠泠
不竭所謂白雲泉也自白樂天題以絕句名遂
顯於世有卓筆峯巾子峯五丈峯石龜照湖鑑
毛魚池大小石屋蓋因好事者得名吳郡志云
此山在吳中最高爲嶺端正特立山皆竒
石山半白雲泉亦爲吳中第一水盧志云山頂
正平有望湖臺下有白雲寺宋叅政范魏公奏
請賜名及公之先隴在焉姑蘇志云在支硎南
五里最多竒石今按此山峯巒峭拔石皆林立
亦無樹藝由以賢達名也

古蹟遠公菴 一名望湖臺正值寺後

頭陀巖 龍門 大小石屋

峯 卓筆峯 高數丈 飛來峯 五丈峯

萬笏林 在寺後

寺 白雲寺 廢置 今爲范氏功德院

廟 忠烈廟 在寺內右偏宋南渡慶州隔

絕置於此 義在義學 俱附出

墓 范公祖墓 在山右三代俱贈太師追

封公石山土穴今稱三太師墓

龍圖范師道墓 在寺西趙抃誌

范成大墓 在山南更名仰天山舊有

覺巖寺奉墓祀亦廢

嶺 羊腸嶺 迂曲而長有人行

餘山八

秦臺山 秦始皇遊會稽嘗登此 翁家山

鷄籠山 馬鞍山 仰天山 赤山

龍池山 北 白羊山 兪

城西北名山

華山異地記云在縣西二十里老子枕中記云

吳西界有華山可以度難其山蒼鬱幽邃晉太

康二年生千葉石蓮花狀之羽化因曰華山長

林森天荒楚翳日續圖經云華山於群山獨秀

望之如屏或登其巔有云蓮花狀以此得名或

云晉太康中曾生千葉蓮花也姑蘇志云華山

去陽山東南五里山半有大壑曰天池今按此

山多石少土無樹藝特以巖谷幽僻為勝昔之

名人南朝張裕嘗以此爲隱居後宋張漢卿亦宅其中仙逸著名之山也

古蹟天池

長數十丈其泉王色橫浸山腹

石壁

此山峰巒羅列丹碧如畫

佛國山

張漢卿題

釣灘

漢卿題

嶺

涅槃嶺

賀九嶺

鷄窠嶺

並高

寺

華山寺

在蓮花峰下晉支道林建

餘山十

鹿山

北 漢陽山

野濱山

南

清流山

西 龍池山

龍山

錦峯山

鳳凰山

西北

卑猶山

王遮山

北

太湖中洞庭兩山

西洞庭一名包山在太湖中吳地記云在縣西

一百三十里四面以水包之故云包山或又謂

仙人鮑靚所居通呼鮑爲包也一名洞庭山又

名林屋山或云夫椒山也水經云太湖有苞山

春秋謂之夫椒左傳云哀公元年吳伐越敗之

夫椒杜預云太湖中椒山輿地志亦云包山即

夫椒山又云夫湖有苞山週迴一百三十五里

居者數百家傍有小山山有石穴南通洞庭深
遠莫知所極名林屋洞天吳縣圖經云在縣西
一百一十里今按此山多土少石宜柑橘楊梅
山人之所資也

林屋洞天

按吳地記云包山中有洞庭深

遠世莫能測吳王闔廬使靈威丈人入

洞穴十七日不能盡因得禹書郡國志

云洞庭山有宮五門東通林屋西達蛾

眉南接羅浮北連岱岳東有石樓樓下

兩石扣之清越所謂神鉦者也有青童

乘獨飈飛輪之車至此尚傳其跡上有

天帝壇在焉玄中記云吳國西有具區

澤澤中包山有洞庭室入地下潛行通

瑯琊東武山穴中之石多有道人馬跡

又云林屋山名包山在太湖中下有洞

潛通五岳號天台別宮昔禹治水過會

稽夢人衣玄纁告治水法在北址鉤魚

中并不死方禹得藏於包山石室吳人

得之不能曉問孔子云王居殿赤雀銜

書集庭此何文字曰此禹石函文也真

語云天后者林屋洞之真君住在太湖
包山下又云包山下有石室銀戶方圓
百里有白芝隱泉其水紫色婁地記
云太湖東小山名洞底純石巉巖水惟
松栢山有三穴東頭北面一穴不容人
西頭南面一穴亦然並有清泉湧出西
北一穴偃僂纔得入穴外石盤礴形勢
驚人穴裏一如開堂屋上高丈餘恒津
潤四壁石色青白南壁開處側肩得入
潛行二道北通嶼東武縣西通長沙

巴陵湖吳孫權使人行三十餘里而返
云上聞波浪聲有大蝙蝠如鳥拂殺火
穴中高處照不見顛穴有鐘乳冰寒不
可入春夏可入風土記云包山洞穴潛
行地中無所不通謂之洞庭地脉道書
云林屋洞是十大洞天之第九洞一名
左神幽虛之天洞有三門同會一穴洞
中之石綠色如刻有金庭玉柱靈跡異
狀不可殫記向東百步有石鼓石鍾繫
之聲清遠又十步有石半掩謂之隔凡

至此側身可入人不敢往洞側有神景宮及毛公壇漢劉根於此學道

古蹟范蠡宅 在杜圻洲北馬跡山南地方

十里

角里村 秦角里先生所居角里先生

吳人姓周名術字元道泰伯之後

在山西南

峯 縹緲峯 最高山之王峯

寺 法華寺 護國天王院 上方寺唐建

包山寺 梁建 祇園寺 晉吳猛捨宅建

水月禪寺 梁建

觀 靈祐觀 唐建 舊名神景宮

上真宮 梁建

廟 聖姑廟 晉三彪女 包王廟 原在

祇園寺外分九壇

餘山十

鳳凰山 金鐸山 吳晉歲金鐸於此 已上三山並

北麓 禹期山 禹導景以漢區斯會諸侯於此名禹跡山

金庭山 玉桂山 一名桂山與金庭兩山相對

龜山 上有神女祠 龜山 已上五山俱在東麓

梭山 石公山 鷄籠山 並在南

東洞庭一名莫釐山又名胥毋山吳縣圖經云在縣西七十里姑蘇志云其山周迴八十里上有居民數千家規包山差小而廬聚物產大畧相同今按此山多土少石宜柑橘楊梅枇杷諸果木富饒多產之山也

古蹟蔡經宅 在蔡仙鄉按洞庭記云漢蔡

經居此學道因名其鄉盧志則云經宅在縣後朱明寺西

峯 莫釐峯 在法海寺後一山主峯

寺 法海寺 隋建 翠峯禪院 唐建

長圻寺 梁建 彌勒寺 吳越王建

靈源寺 隋建 興福寺 梁建

廟 東嶽行祠 宋建

餘山六

射鷄山 吳羨鷄於此有鷄下射之 虎山 昔吳於

此山上築穿養虎同名山 豐圻山 呈三山並在東麓

韓山 在北麓 長圻山 在羣 大龜山 在羣

湖中諸山六十五

夫椒山 或云即包山賀循會稽記云夫椒山在太湖中洞庭山西北

津里山 橫山 陰山 葉余山

長沙山 已上在包崑 衡山 漫山 在長沙之西

三山 三山相近向東一山名東鴨山向西山名西鴨山居甲山總名三山

余山 澤山 俱在東洞庭西南 錢堆山 大岷山

小岷山 獨山 與無錫山對相傳中斷為太湖 三峯山

大峯山 小椒山 與夫椒相對而差小 郊浮山

杜圻山 一名杜圻州在包山北楚蠶釣處自錢堆以下俱在馬跡崑

大貢山 小貢山 五石浮山 有五山相近

大雷山 小雷山 兩山相對 南鳥山 北鳥山

大千山 小干山 青浮山 曠浮山

東獄山 西獄山 相傳吳至於此置男女三獄也 紹山

琴山 杵山 粥山 相傳吳王餽囚於此 大竹山

小竹山 長浮山 癩頭浮山 殿前浮山

龜山 與龜山相對而差小 大謝姑山 小謝姑山

垓山 舍山 歷耳山 筆格山 石蛇山

大鼉山 小鼉山 箭浮山 王舍山

苧溪山 猫山 鼠山 兩山相趨對峙如猫逐鼠

白浮山 筍帽山 石牌山

吳邑志卷第十一

吳邑志卷十一

六

